

四庫全書

集部

欽定四庫全書

宋元詩會卷十五

兵部主事陳焯編

王琪

字君玉珪之從兄也起進士調江都主簿上時務
十二事仁宗嘉之除館閣校勘集賢校理出通判
舒州知復州累遷知制誥以使朔方感疾道還謫
團練副使久之加龍圖閣待制知潤州徙江寧歷
鄧州揚州入判太常寺出知抗
州以禮部侍郎致仕年七十二

秋日白鷺亭向夕風晦有作

白鷺敞西軒檐宇窮爽塏十峰若聯環翠色不可解是
時天雨曠六幕無纖靄金斗熨秋江素練橫衣帶乾坤
清且歛氣象朝昏改蘆花作雪風飛舞來滄海九霄汀
鷺起萬里檣烏快月上三山頭鳥沒橫塘外滄茫洲渚
寒銀錯星斗大開樽屏絲竹披襟向簫籟余生本江湖
偃蹇欣所會清興雖自發苦嗜亦吾累魚龍憑夜濤四
面忽滂湃安得犀燈然煌煌發水怪

吳中曉寒曲

大澤穹天莽同色碧瓦閭門曉花白石巖左右斷行人
洞庭一夜冰千尺曾持使節龍沙壘北風如刀割人耳
知憐凍足苦霜催一生不向邊庭履憑誰贈我紫綺裘
中吳風土清且柔令嚴氣正天地肅長歌白苧臨寒流
玉蘭酒熟金醅溢大白連雲尚缺克書牕半掩晝始開
幾日紅梅斷消息

清輝殿觀唐明皇山水石字歌

皇家四葉恢聖功天臨日燭清寰中漢條靜治洽柔教

老心稽古開神聰有唐英主稱好文仙毫灑落驅風雲
壯哉山水有奇字煥乎八法存翠珉自從棄置咸陽道
鮮駁煙滋委宮草天開神贊會休辰甄收再作皇居寶
如何淪廢三百春迎逢睿鑒來紫宸奎鈎粲粲光華動
羣玉森森氣象新丹籙春妍瑞靄深文梁藻井結芳林
鴻翔鳳翥徑方丈杯流泉涌蒙親臨臣榮幸從金輿
袖拂魂驚拭目初多慙攬筆非青鏤唯慶千齡際帝圖

九曲池

越調隋家曲當年亦九成哀音已亡國廢沼尚留名儀
鳳終沈影鳴蛙祇沸聲淒涼不可問落日背蕪城

金陵賞心亭

千里秦淮在玉壺江山清麗壯吳都昔人已化遼天鶴
舊畫難尋卧雪圖冉冉流年去京國蕭蕭華髮老江湖
殘蟬不會登臨意又噪西風入座隅

答永叔問月

斑斑疎雨寒無定皎皎圓蟾望欲闌應在浮雲最深處

更憑絲竹一催看

按石林詩話晏元獻守南都王君玉時為僉判中秋夕陰晦無月欲

張醺未果君玉作詩呈元獻曰只在浮雲最深處試憑絃管一吹開公從枕上得詩大喜急索衣起召客治具笙歌甫作雲散月出遂同參佐劇飲為達旦之歡豈即移用此句耶

張先

字子野吳興人天聖八年進士詩人張維子也少以樂府馳名其詞有雲破月來花弄影浮萍斷處見山影隔牆送過鞦韆影為平生最得意句當時號曰三影尚書年八十餘尚蓄聲伎蘇東坡嘗作詩戲之按同時又有一張先亦字子野已附辭於維詩之後

巢烏

烏啼東南林危巢雖五六心在安巢枝一日千往復脫
網得羣食入口不入腹窮生俾反哺豈能報成育

題花下無相院西溪

積水涵虛上下清幾家門靜岸痕平浮萍破處見山影
小艇歸時聞草聲入郭僧尋塵裏去過橋人似鑑中行
已憑輦語添秋色莫放修蘆礙目生

潤州甘露寺

丞相高齋半草萊舊時風月滿亭臺地從日月生時見

眼到江山盡處回三國是非春夢斷六朝城闕野花開
心隨潮水漫漫去流徧煙村半日來

吳江

春後銀魚霜下鱸遠人曾到合思吳欲圖江色不上筆
靜覓鳥聲深在蘆落日未昏聞市散青天都淨見山孤
牆南水漲虹垂影清夜燈光照太湖

贈妓兒娘

十載芳洲撫白蘋移舟弄水賞青春當時自倚青春力

不信東風解誤人

蘓舜欽

字子美。叅知政事。易簡之孫。狀貌奇怪。少有大志。天聖中文體卑弱。仍五代舊習。獨舜欽與河南楊修好。為古文。時賢多從之。遊初用蔭補太廟齋郎。調榮陽縣尉。尋舉進士。改光祿寺主簿。歷大理評事。監在京店宅務。范仲淹薦其才。召為集賢校理。監進奏院。是時杜衍與仲淹富弼在政府。引用正人多。所更張中丞王拱辰等頗嫉之。而舜欽杜衍壻也。會進奏院祠神。舜欽與同官鬻故紙以公錢置讌。會拱辰廉符之。諷其屬魚周詢核奏。意在搖動衍等。事下開封府核治。於是舜欽與同會十餘人皆落職。舜欽放廢。寓吳中。後得湖州長史卒。

感興 三首

後寢藏衣冠前廟宅神主吾聞諸禮經此制出中古秦
嬴食先法乃復祭於墓漢衣以月遊於道蓋無取宣帝
尊祖廟失制徧九土孝元酌前文一旦悉除去魏帝樂
銅臺遺令置歌舞昏嗣竟從之此事狂夫阻唐制益紛
華諸陵銷嬪御曠女日哀吟於先亦奚補吾朝三聖人
乘雲不可睹威靈已霄漢嗣皇念宗祖繪事移天光刻
象肖神武徧勅舊遊地輸材起宮宇階城釳以金牆壁

衣之黼功既即奉迎法仗疊簫鼓玩好擇珍竒目奪不
可數三京佛老家已有十數處朝家雖奉先越禮古不
許君不祭臣僕父不祭支庶丹楹豈非孝聖貶甚蕭斧
大祀當以時寢廟即其所惜哉共儉德乃為侈所監痛
乎神聖姿遂與缺為侶蒼生何其愚瞻歎走旁午賤子
私自嗟傷時淚如雨

昔在帝舜日光宅闕四門所貴無凶邪德教日益敦末
世多濫姦九重嚴大閤扞擷主譏察誰何辨語言一關

百力士列名甃石溫設官按尺籍唱號於宋昏唐末稍
懈怠嘗值外使奔京城凶豪兒奮劒闖帝藩狂呼嘯虎
豹便欲傾乾坤賴有宰相在不然神器翻我朝講制度
門籍反不存近知賤丈夫突人犯赤軒陞官未暇執呶
呶何其喧祖宗創業難慎重在後昆弟夫猶重閉况乃
天子尊何羅猶宜察况乃外寇屯興語一及此舌出反
自捫吾家本寒微世受朝廷恩欲奏鳴鵠詩當塗誰薦
論

瞽說聖所擇愚謀帝不罪況乎言有文白黑時利害前
日林書生自謂胸臆大潛心撫世病策成謂可賣投額
觸諫函獻言何耿介云昨見凶星上帝下警戒意若曰
昏啄出處恣蜂蠆安坐弄神器開門納珍賄宗支若繫
囚親親禮日殺大臣尸其柄咋舌希龍拜速速伐虎叢
無使自沈瘵陛下幸察之聰明即不壞如忽賤臣言不
瞬防禍敗一封朝飛入羣目已眦睚力夫暮塞門執縛
不容喟十手捽其胡如負殺人債幽居死牢中繫灼若

龜蔡亦既下風指黥面播諸海長塗萬餘里一錢不得
帶必令朝夕間渴饑死於械從前有口者縮脰氣如憊
獨夫已去除易若吹糠稗奈何上帝明非德不可蓋條
忽未十旬炎官下其怪乙夜紫禁中一燎不存芥天王
下牀走倉猝畏挂礙連延舊寢廷頓失若空塞明朝黃
紙出大赦徧中外嗟乎林書生生命不可再翻令凶惡
囚纍纍受恩貸

林書生賴此詩以存
又逸其名愈足悲矣

興慶池

餘潤漲龍渠疏溜連清漣助曉遠昏山浮秋明刮眼漁
歸別浦閒雁下滄波晚岸北有高臺離魂蕩無限

蜀士

蜀國天下險竒怪生中間有士賈其姓抱才東入關獻
策叩諫鼓其言藟可觀願以微賤軀一得至上前掉舌
滅西寇畫地收幽燕且云太平久兵戰無人言臣嘗學
其法自集數百篇治亂與成敗密然不可刪三獻輒罷
去志屈心悲酸將相門戶深欲往復見攔負販冒日熱

引重衝雪寒羈苦輦轂下以圖晨夕餐如此三歲餘夜
夜抱膝歎義者或賑給遂復歸巴川嗟乎區宇大此徒
亦已繁城市與巖穴隱默孰辨旃幸得出自鬻何惜置
末班吾相柄天下處事當機先古之設爵位蓋欲英雄
纏次第立名級不使智慮間稍有才器者必以祿仕牽
所患在不出既出那棄捐放蛟人大水驅虎還深山失
一故無害其類莫可攀

獵狐篇

老狐宅城隅涵養體豐大不知窟穴處草木但奄藹秋
食承露禾夏飲灌園派暮夜出旁舍雞畜遭橫害晚登
埤現鳴呼吸召百怪或為嬰兒啼或變艷婦態不知幾
十年出處頗安泰古語比社鼠蓋亦有恃賴邑中年少
兒耽獵若沈瘵遠郊盡雉兔近水殲鱗介養犬號青鵠
逐獸馳不再勇聞此老狐取必將自快縱犬索幽邃張
人作疆界茲時頗窘急迸出赤電駭羣小助噉啐奔馳
數顛沛所向不能入有類狼失狽鉤牙咋巨頰髓血相

潰沫喘呌遂死矣爭觀若期會何暇正首丘腥臊滿蓬
艾數穴相穿通城堞幾隳壞久此縱凶妖一旦果禍敗
皮為榻上藉肉作盤中膾觀此為之吟書以為警戒

舟中感懷寄館中諸君

時得告之山陽挈家

扁舟迎春色東下淮楚鄉側身風波地回首英俊場顧
我本俗材百事無一長濫迹入冊府舉動初不皇乍脫
泥滓底稍見日月光峻閣鬱前起隱嶙天中央春風花
竹明曉雨宮殿涼溢目盡圖史接翼皆鸞鳳明牕置刀

筆大案羅縑細文字雖幼學鈍慵今廢忘不能溫舊習
考古評興亡覩顏於其間汗下如流漿徒然日飽食出
入隨羣行朝廷此多事亦合彊激昂況有詔書在爛然
貼北牆奮舌說利害以救民膏盲不然棄硯席挺身赴
邊疆喋血鏖羌氏胷膽森開張彎弓射攬槍躍馬埽大
荒功勲入丹青名迹萬世香是亦丈夫事不為鼠子量
數事皆不能徒只飽腹腸有如鳬雁兒嗷嗷守稻梁歲
月今逝矣齒搖髮已蒼於時既無益自合早退藏諸君

天下選才業吁異常願當發策慮坐使國富強三辰期
順軌四海無災殃莫效不肖者所嚮皆荒唐又不耐羞
恥但欲歸滄浪濡毫備歌詠仰首看翱翔舟中稍無事
思念益以詳恨無一稜田可以足糟糠出處皆未決語
默兩弗臧莽不知所為大叫欲發狂作詩寄諸君鄙懷
實所望

依韻和勝之暑飲

九夏苦炎烈人伏氣候惡况茲大旱時其酷甚炮烙爭

得昇復生射此赤日落欲擘青天開騰身出寥廓狂走
無處逃坐恐肝腦涸不如以酒澆庶可免焦爍相呼坐
僧居頃刻醕百酌佳瓜判青膚熟李吹絳膜尚嫌味不
爽更與冰雪嚼裂耳發浩歌解顏縱善謔逕趨無何鄉
回覺萬事錯不知余中虛外冷得所託真氣潛遁亡半
夜忽發霍嘔洩不暫停迸筋走兩腳初如巨繩纏忽似
秋蚓躍委頓體不支藜牀為穿鑿君言暑飲佳但得一
餉樂艱難逾旬時僅飲數斗藥快意事皆然遺殃慎無

作

答梅聖俞見贈

自嗟處身拙與世常齟齬至於作文章實亦少精趣低
摧朝市間所向觸謗怒夫子與衆殊琢飾貺佳句瑯然
紙上動讀畢恐飛去自覺異平居恍惚忘世故迥如出
泥塗熏滌失臭污衣之青霞裾飲以紫蕊露輶軒駕飛
黃蹕躐上雲路古貴知者希流俗豈足顧雅言雖可珍
三復未敢賦退慙百不堪尚恐君悔誤

頂破二山詩

北邑有頂山下潛子母虬其子去為雨以救鄉人憂前
擘穹峰開化出百丈湫後因號破山致祠獻庶羞歲來
省其母風雹六月秋烟雲騰踏去不復經月留邑民賴
其靈雖旱歲有收因成兩佛宇幽邃稱勝遊磻前走鸞
車松柱擁石樓夜堂人喋滲陰壁風颼颼近年返暴雨
頗亦傷田疇老農務祈禱梵唄日不休常為釋徒利乃
作生民讐嗚呼二虬者其說何悠悠

中秋夜吳江亭上對月懷前宰張子野及寄君謨

蔡大

獨坐對月心悠悠
故人不見使我愁
古今共傳惜今夕
況在松江亭上頭
可憐節物會人意
十日陰雨此夜收
不惟人間重此月
天亦有意於中秋
長空無瑕露表裏
拂拂漸上寒光流
江平萬頃正碧色
上下清澈雙璧浮
自視直欲見筋脉
無所逃遁魚龍憂
不疑身世在地上
祇恐查去觸斗牛
景清境勝反不足
歎息此地無交游

心魂冷烈曉不寢勉為筆此傳中州

城南歸值大風雪

一夜大雪風喧豗未明跨馬城南回四方迷惑共一色
揮鞭欲進還徘徊舊時崖谷不復見縱有直道令人猜
低頭搶朔風兩眼不肯開時時偷看問南北但見白羽
之箭紛紛來既以脂粉傅我面又以珠玉綴我顙天公
似憐我貌古巧意裝點使莫偕欲令學此兒女態免使
埋沒隨灰埃據鞍照水失舊惡容質潔白如嬰孩雖然

外飾得暫好自覺面目如刀裁不知胃中肝膽挂鐵石
安能柔輒隨良媒世人飾詐我尚笑今乃復見天公乖
應時降雪故大好慎勿改易吾形骸

依韻和伯鎮中秋見月九日遇雨之作

衆皆愛春發枯芳我知惟動兒女懷天地昏酣醉夢裏
人有爽思皆沈埋豈如秋風勁利劇刀劍刮破天膜清
光開衰根危蒂埽除盡辨別松竹并蒿萊青娥供霜洗
夜月兼以皓露驅纖埃當年此夕或陰晦今歲澄澈特

快哉是時呼賓賞此景漸見照我白玉杯清輝向人若
有意經歷牕戶猶徘徊放歌狂飲不知曉爛熳酌客山
嶽顏時節飄流晦朔轉已覺九日來相催北軒隙地破
蒼蘚帶花移得黃金栽倒冠露頂坐狂客擷香咀蕊浮
新醅最憐小雨灑疎竹爽籟颯颯吹醉顙君時傳詩頗
精麗意苦泥淖不得來開緘文采自飛動欲和但愧頑
無才久之黽勉強為答嫌春愛秋真可咍

永叔石月屏圖

日月行上天下照萬物根向之生榮背則死故為萬物
生死門東西兩交征晝夜不停胡為號山石留此皎
月痕常存桂樹散疎陰有若圖畫成永叔得之不得曉
作歌使我窮其原且疑月入此石中分此兩曜三處明
或云蟾兔好溪山逃遁出月不可關浮波穴石恣所樂
嫦娥孤坐初不覺玉杵夜無聲無物來擣藥嫦娥驚推
輪下天自尋捉遶地掀江踏山岳二物驚奔不復見留
此玉輪之迹在青壁風雨不可剝此說亦詭異予知未

精確物有無情自相感不間幽微與高邈老蚌向月月
降胎海犀望星星入角彤霞爍石變靈砂白虹貫巖生
美璞此乃西山石久為月照著歲久光不滅遂有團團
月寒輝籠籠出輕霧坐對不復嗟殘缺蝦蟇縱汝惡觜
吻可能食此清光沒玉川子若在見必喜不徹此雖隱
石中時有靈光發土怪山鬼不敢近照之僵仆肝膽裂
有如君上明下燭萬類無遁形光艷百世無虧盈

田家詞

南風霏霏麥花落豆田漠漠初垂角山邊夜半一犁雨
田父高歌待收穫雨多蕭蕭蠶簇寒蠶婦低眉憂繭單
人生多求復多怨天公供爾良獨難

和石曼卿明河詠

八月銀河好天高夜自明樓臺通迥意風露得餘清幾
為浮雲亂都宜小雨晴離人彊回首耿耿邈無情

靜勝堂夏日呈王尉

虛堂吏事稀吟卧欲忘機牕靜蜂迷出簾輕燕誤飛煩

心傾晚簟倦體快風衣更想霜雲外同君看翠微

黎生下第還鄉

人云之子賢文采出巴川失意聲名在還家歲月遷離
懷春色裏歸路夕陽邊無廢青箱學窮愁古亦然

和解生中秋月

不為人間意居然節物清銀堂通夜白金餅隔林明醉
客樽前倒棲烏露下驚悲歡古今事寂寂墮荒城

獨游輞川

行穿翠靄中絕磴落疎鐘數里踏亂石一川環碧峰暗
林麋養角當路虎留蹤隱逸何曾見孤吟對古松

望秦陵

雄心雖蓋世竟亦棄羣臣役重傾天下時危啟聖人石
麟空舉首銀海罷流春隴闕今無復應深行路塵

晚出潤州東門

京口古雄處昔年嘗此過風流看石獸人事共江波河
轉路疑盡日斜山更多城樓鬱天半回首恣吟哦

離京後作

春風柰別何一櫂逐驚波去國丹心折流年白髮多脫
身離網罟含笑入煙蘿窮達皆常事難忘對酒歌

淮亭小飲

山氣復清淮亭臨亂石開旅愁無處避春色為誰來酒
賴啼鶯送歌隨去雁哀相攜聊一醉休使壯心摧

過泗水

五年六經此仰首歎勞生山是往時色人皆今日情機

心去國少塵眼向淮明物理吾俱曉漂流安足驚

秋雨

陰風攪林壑驟雨到江湖白日不覺沒繁雲何處無樓
吟涼筆硯溪夢亂菰蒲聞說金華甚污泥入敝廬

詩僧則暉求詩

全吳氣象豪詩思各翹翹風雅久零落江山應寂寥會
將趨古澹先可去浮囂好約長吟處霜天看怒潮

游洛中舊內

洛陽宮闕鬱嵯峨，千古榮華逐逝波。
別殿秋高風淅瀝，後園春老樹婆娑。
露凝碧瓦寒光滿，日轉觚稜暖艷多。
早晚金輿此游幸，鳳樓前後看山河。

送家靜及第後赴官清水

幾年塵土客京華，一日春乘犯斗槎。
夢好夜歸金蜀道，眼明朝宴上林花。
白頭佐邑非為晚，藍綬還鄉亦可誇。
況有雄圖看悟主，莫傷孤宦向天涯。

宿太平宮

驅車長道久塵勞一宿清宮醒骨毛古檜有風天自籟
石壇多露鶴爭唳星河耿耿秋還迥樓觀澄澄夜更高
吟對疎鐘俗機盡已疑身世屬仙曹

春暮初晴自御宿川之華嚴寺

春暮曾無屬物心野行聊得據鞍吟路經廢苑情通古
水遶蒼山意共深殘日花間浮暖艷斷雲樓外卷輕陰
騷人自昔傷鶗鴂休向風前送好音

望太湖

杳杳波濤閱古今四無邊際莫知深潤通曉月為清露
氣入霜天作暝陰笠澤鱸肥人膾玉洞庭柑熟客分金
風煙觸目相招引聊為停橈一楚吟

松江長橋未明觀漁

曙光東向欲朧明漁艇縱橫映遠汀濤面白煙昏落月
嶺頭殘燒混疎星鳴榔莫觸蛟龍睡舉網時聞魚鼈腥
我實宦游無況者擬來隨爾帶苓箬

壽陽間望有感

維舟亭下偶登臨
下蔡風流古至今
遠嶺抱淮隨曲折
亂雲行野乍晴陰
幽人憔悴搔白首
啼鳥哀鳴思故林
觸處塗窮何足慟
直回天地入悲吟

春睡

別院簾昏掩竹扉
朝醒未解接春暉
身如蟬蛻一榻上
夢似楊花千里飛
嗒爾暫能離世網
陶然直欲見天機
此中有德堪為頌
絕勝人間較是非

中秋松江新橋對月和柳令之作

月晃長江上下同畫橋橫絕冷光中雲頭豔豔開金餅
水面沈沈卧綵虹佛氏解為銀色界仙家多在玉華宮
地雄景勝言不盡但欲追隨乘曉風

和彥猷晚宴明月樓二篇

溪聲來從一氣外樓角插在蒼霞中艷歌橫飛送落日
哀箏自響吹霜風低昂黛色四山黯凌亂纈紋疎樹紅
憑欄揮手問世俗何人得到蟾蜍宮

向晚天邊燕席開溪山相照絕纖埃綠楊有意簷前舞

涼月多情海上來
香穗縈斜凝畫閣
酒鱗環合起金罍
自疑身是乘槎客
泛徹銀河却欲回

秋宿虎丘寺數夕執中以詩見贖因次原韻

生事飄然付一舟
吳山蕭寺且淹留
白雲已有終身約
醪酒聊驅萬古愁
峽東蒼淵深貯月
巖排紅樹巧裝秋
裴回欲出向城市
引領煙蘿還自羞

晚泊龜山

南灣晚泊一裴回
小徑山間佛寺開
石勢向人森劒戟

灘光和月瀉瓊瑰每傷道路銷時序但屈心情入酒杯
夜籟不喧羣動息長吟聊以寄餘哀

滄浪靜吟

獨遶虛亭步石缸靜中情味世無雙山蟬帶響穿疎戶
野蔓盤青入破牕二子逢時猶死餓三閭遭逐便沈江
我今飽食高眠外唯恨澄醪不滿缸

丹陽子高得逸少瘞鶴銘於焦山之下及梁唐諸
賢四石刻共作一亭以寶墨名之集賢伯鎮為

之作記遠來求詩因作長句以寄

山陰不見換鵝經京口今存瘞鶴銘瀟灑集賢來作記
風流太守為開亭兩篇玉蕊塵初滌四體銀鈎蘚尚青
我久臨池無所得願觀遺法快沈冥

關都官孤山四照閣

勢壓蒼崖險可驚攀雲半日到軒楹旁觀竹樹回環翠
下視湖山表裏清漸覺愁隨煙霧散只疑身有羽翰生
他年君掛朱幡後蠟屐筇枝伴此行

清軒

誰鑿幽軒刮眼清湖中嘉處更禪局龍聽夜講寒生席
鷗伴晨齋暖戲庭水月澄明應作觀雲山濃淡自開屏
我公亦為留奇句此地人間合有靈

某為世所棄困居于蘇平生交游過門不顧長安
侍讀葉丈不以秦吳之遠高下之隔閤此窮悴
特貺以詩然韻險句奇不可攀續仰酬高誼彊
挾蕪音

公鎮西都擁劇權遠嗟窮苦寄新篇氣雄迥出關河外
句險空驚魚鳥前玉帳夜嚴兵似水茅齋春靜草如煙
才愚榮悴皆殊絕自笑相酬更斐然

寄題趙叔平嘉樹亭

嘉樹名亭古意同拂簷圍砌更青蔥午陰閒淡茶煙外
曉韻蕭疎睡雨中開戶常時對君子遶軒終日是清風
盤根得地年年盛豈學春林一飢紅

秋夕懷南中故人

向夕依欄念昔遊蕭條節物更他州池光不動天深碧
月色無情人獨愁千里江山幽信絕一場風露敗荷秋
征鴻急急知何事斷續哀鳴過不休

聞京尹范希文謫鄱陽尹十二師魯以黨人貶郢
中歐陽九永叔移書責諫官不論救而謫夷陵
令因成此詩以寄且寬其遠邁也

朝野蔚多士衰然良可羞伊人秉直節許國有深謀大
議搖巖石危言犯采旒蒼黃出京府憔悴謫南州引黨

俄嗟尹移書遽竄歐安慙言得罪要避曲如鉤郢路幾
束馬荆川還沂舟傷心衆山集舉目大江流遠動家公

念

師魯父作
牧於東川

深貽壽母憂

永叔有
母垂老

橫身罹禍難當路積

仇讐衛上寧無術亢宗非所優吾君思正士莫賦畔牢
愁

秋懷

年華冉冉催人老風物蕭蕭又變秋家在鳳凰城闕下

江山何事苦相留

初晴遊滄浪亭

夜雨連明春水生
嬌雲濃暖弄微晴
簾虛日薄花竹靜
時有乳鳩相對鳴

冬日偶書

謾走聲名三十年
亦曾文采動君前
玉顏皓齒他人樂
獨守殘燈理斷編

小酌

寒雀喧喧滿竹枝
驚風淅瀝玉花飛
霜柑糖蟹新醅美

醉覺人生萬事非

江休復

字鄰幾陳留人少彊學為文淳雅尤善于詩進士起家為藍山尉騎驢之官每據鞍讀書致迷失道家人求得之舉書判拔萃改大理寺丞判尚書刑部坐與蘇舜欽祠神會落職稍起知奉符縣累遷至尚書刑部郎中卒有文集二十卷

秋懷

西風萬里至曠然天地秋暮雨生夕涼百蟲鳴啾啾楚山曉蒼蒼楚水亦悠悠騷人試登臨感物增離憂所思

在遐方欲往路阻修香草有蕙茝嘉樹有梧楸白露委
芳馨彫零使我愁窮年倦羈窘江湖思舊遊紉蘭製艾
荷飄泛一葉舟肆情雲水間意適何所求

同持國宿太學官舍

翳翳雲月薄冷冷雪風清學省夜岑寂天街斷人行廣
庭層閣陰尋廊步餘明松篠遞遙響如聞絃誦聲悠悠
子佩詩講坐塵埃生迴就直舍休疊疊談道精心會境
物融泯然遺世營寒眠屢展轉寤言寫素誠

年馳岡閱馬

牧馬散近垆閱視乘高秋馳岡似沙苑堆島帶川洲坡
陀故梁城縈薄西南陬連棚映林樾星羅倚層丘回風
吹陣雲奔騰歛來游野性脫羈馭飲齧遂所求腹幹頗
肥張鬱怒何彪休羣毆驟麋鹿逸勢凌蛟虬軍戎選輕
捷和鑾御調柔毛物有千名衆美歸驊騮梁王愁思臺
佛刹居上頭竭來一憑眺遺墟莽悠悠信陵骨已朽巖
穴誰見收當時英豪革事逐東波流置酒臨風軒聊以

紓煩憂



宋元詩會卷十五

欽定四庫全書

集部

宋元詩會卷十六

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣黃 鑫

欽定四庫全書

宋元詩會卷十六

兵部主事陳焯編

黃庶

洪州分寧人庭堅之父仕宦不達工詩文號青社先生著代檀集數十卷庶起西崑諸子之後其詩弗以綺麗為能疎朴蒼堅自成風格故集中有和劉子儀作題同而調迥別也人謂涪翁開江西之宗派抑知後海先河猶有阿翁在乎平生亦雅耽臨池觀教兒學書詩可見然則寶山谷之翰墨者固宜識所由來矣

對花

伊昔甫白在造化困刀尺我生幾年後浪自鐫頑石對
花雖把筆好句恨莫得來陽與采石孤墳沒荆棘幾欲
肉白骨再挿風雅翼海為一杯酒地為一領席坐吟籠
萬物語出埋霹靂乾坤髓可掬鬼神淚可滴人生貴適
意身是天地客糟脍不可乾吟紙須強擘花落若解醫
有金費千鎰

宿趙屯

蘆花一曲水弭揖日已暮山間聞雞犬無人見烟樹行
逐羊豕跡始識入市路菱芡與魚蟹居人足來去漁家
無鄉縣滿船載稚乳鞭笞公私急醉眠聽秋雨

此詩與大孤山

一首山谷嘗手書刻石于南康星子灣有跋見別集

賦小桐

小桐纔幾尺氣壓百歲樗雨露意未飽風月韻已孤鳳
凰肯寂寞燕雀空踟躕天地有和氣想為桐之腴我願
刻作琴獻上九重居坐使熏風還雖死骨不枯

次韻和子儀聞蟬

落日挂樹間長我庭下陰園林動秋意高蟬忽微吟清
風轉餘響悠然下遙岑微物感時節鏗錡吐商金古樂
久破碎茲蟲抱全音荒忽尚偃蹇激起壯士心願為秋
蟬操被之朱絲琴

大孤山

彭蠡百里南國襟萬頃蒼烟插孤岑不知天星何時落
春秋不書不可尋石怪木老鬼所附茲乃與水同浮沈

鳴鵠大藤樹下廟祭血不乾年世深舳艫千里罔敢越
割牲醢酒來獻斟我行不忍隨人後許國肝膽神所歆
落帆夜宿白鳥岸睥睨百遶寒藤陰銀山大浪觸天險
比干一片崔嵬心宦遊遠去父母國心病若有山水淫
江南畫工今誰在拂拭東絹傾千金

右與宿趙屯
同在石刻

汴河

汴都戕我在平地宋恃其德為金湯先帝始初有深意
不使子孫生怠荒萬艘比來食京師汴水遂作東南吭

甲兵百萬以為命千里天下之腑腸人心愛惜此流水
不啻布帛與稻粱漢唐關中賴輸輓木牛可以腐太倉
舟楫利今百于古奈何益見府庫瘡天心正欲醫造化
人間豈無針石良窟穴但去錢穀蠹此水何必求桑羊
家童來持雙井芽數數飲之輒成詩以示同舍

我疑醇醲千古味寂寞散在山茶枝雙井名入天下耳
建溪春色無光輝吾鄉茶友若敵國糞土尺璧珍刀圭
嗟予奔走車馬跡塵埃荊棘生喉頤煮雲為腴不可見

青泉綠樹應相嗤長鬚前日千里至百茅包裹林巖姿
開緘春風若滿手喜氣收拾人恐知江南陽和夜欲試
小齋獨與清風期汲得甘泉火亦得混沌不死元氣肥
詩書坐對為客主一吸已見沆瀣醅通宵安穩睡物外
家夢欲遣不肯歸不信試來與君飲洗出正性還肝脾
和象之雨後望少室山白雲

塵埃奔趨插手版十年已賣山中閒相逢少室若交舊
白雲與我開容顏風驅烟塵去蔽幕長天覆碧無瑕瘢

我疑岳神宴天上汎掃伊洛為圖看又疑山鬼有寒稅
續絮萬纍輸陰官色如可餐無厭飽玻璃為甌炊琅玕
去去還觀不能已一里回首百據鞍長安許生以畫名
閒暇拂拭新素紈能求山高水深趣常恐造化在筆端
每觀雲泉得意處擬寫人物家其間今對異景慙首鼠
愚若犬彘編槽欄君詩託我有深意明月一杯心往還
遣懷

六載紅蓮客差池又一年無人和白雪有意補青天肝

膽論興廢詩書謁聖賢尊中古日月窮達付陶甄

寄子蒙授常寧令

踈率君堪愛無心宦又高身思眠白屋人勉著青袍號
隱疑名福

前為寧鄉尉
自號史隱

貪歸似姓陶常寧邑雖小應合

得牛刀

郡廳誦書偶成

主人調鼎手千里刀迎虛暗使民如堵能容吏似携莓
苔眠杻械燕雀聽詩書刀筆慙無補身為白蠹魚

和子玉病起遊書齋

蕭齋久不住筋力試筇初
牕戶蝸涎瑣塵埃鼠跡書
病魔雖已去詩癖竟難除
苔地欣重掃徘徊意有餘

次韻和雪霽西湖

雪會遊人意元朝變物華
醉鄉銀作界詩客玉為家
魚影紋冰縠禽蹤篆霰沙
餘英恐銷盡目斷夕陽霞

教繩權學書偶成

文事有緣曾弄墨

小子生周一歲
先弄墨於眸盤

見來官小慰咨嗟聊

將筆墨傳生計不失詩書作世家字識姓名能指點寫
因帖妥不傾斜著鞭莫落時人後三十塵埃監汝爺

探春

雪裏猶能醉落梅好營杯具待春來東風便試新刀尺
萬葉千花一手裁

登大雲頂

區區霸迹欲知小試絕大雲孤頂看老僧指我日上處
鏡面湧出黃金盤

青州去海尚踰二百里寺僧
云山頂日出時往往見海

余靖

字安道韶州曲江人少不羈以文學稱鄉里舉進士起家為贛縣尉改將作監知新建縣遷秘書丞數上書論事以救范仲淹落職監筠州酒稅徙監泰州稅知英州遷太常博士復為校理同知禮院擢右正言使朔方進修起居注在職數言事而糾劾大臣夏竦等及爭元昊歲賜風力尤著會元昊歸欵朔方忌宋詐遣使助兵力破欵局即命靖往報之屈其議而還以作朔語詩被劾出知吉州因請養居曲江再起知虔州丁父憂去會儂智高反詔以廣南西路委靖經制賊平遷尚書工部侍郎徙知潭州又徙青州官至工部尚書卒謚襄靖

遊韶石

世務常喧囂物外有真賞結友探勝槩放情諧素想韶
山南國鎮靈蹤傳自曩雙闕倚天秀一逕尋雲上長江
遠縈帶衆巒疑負襁千里眇平視萬形羅怪象日影避
崑崙黿頭冠方丈青螺佛髻高羣玉仙都敞霞城晴煜
燐桃源春浩蕩仰攀霄漢近俯瞰神鬼悅澗深流如織
巖虛動成響造化與真質妙畫胡能做賤子生海隅逢
辰辱朝獎靡成彝鼎勲甘從丘壑往驚禽戀故林困驥
畏羈鞅茲遊得幽深同懷樂清曠世言帝有虞朔南聲

教廣丹丘卜巡幸翠華臨蒼莽簫韶曾此奏鍾石無遺
像但覺熏風存蕭然天籟爽姬公著治典歷代所遵仗
九野奠山川萬靈咸肸鬯醫閭與吳嶽半列遐荒壤四
時迎氣祠猶煩禮官掌況乃祝融區羣物資養來儀
威鳳居樂育菁莪長膚寸起成霖崇高一方仰躋之佐
衡霍無慙公侯享

遊大峒山詩

并序

予嘗恨遊觀山川皆前賢所稱圖籍所著者耳未能

索幽訪異興音馬迹之外得古人所遺絕境一寓目
焉因狀其名物與好事者傳之無窮也韶之境富于
山水而佛刹占勝相望于野其名聲洽于四方者無
幾頃閒居里舍與上饒從事子元王君擷其遺槩得
大峒焉始自州治水行七十里得月華山捨舟揖肩
籃輿道樵徑又十五里乃至是山觀其磅礴聳峭秀
倚天際絕頂之上千里在目日浮月沉雷驚虹斷隨
方下睨晦明異壑則雖丘垤衆山蛟螭聚落不足喻

其高也相與拂幽石翳脩林澗聲泠泠清入毛骨真
可遺世而絕俗豈獨攄憂賞異而已耶各為詩以誌
之自漢武帝元鼎六年庚午歲始平越為郡縣凡一
千七十年至皇朝建隆元年庚申歲始有僧建刹而
居之又七十九年始為什方院又二祀康定元年庚
辰歲始有衣冠遊者豈天作地藏有所待哉王君暨
同遊本郡布衣李訪月華月羅浮達二禪師咸書名
于長老習公方丈壁云

十里松檜風萬仞斗峭壁陽崖雷自奔陰壑雪猶積勢
爭衡霍雄地控楚越阡胡為千載聞名未光圖籍物乃
因人彰聞人于在昔不逢巢由高箕山亦頑碧我今共
遊覽逍遙非俗格劇論窮古今玄談叩虛寂攀蘿躡孤
峰和雲坐幽石濯纓清冷泉留為不朽迹

題白蓮菴

掩室昔宴居冥心遺萬化
茁茁本無染紛華共高謝
夜禪杉月落晨齋庭鳥下
檐間雲氣浮池面秋香詫
演法

辭故棲幽蹤賁寒野蠟屐此同遊願結宗雷社

題劉太博棲心亭

宏構小侯第避權長掩關地分金穴貴人共白雲間野
色春牆外池香暮雨間燕申忘萬慮吏隱敵箕山

留題龍光禪刹呈周長老

尋幽逢勝地方外趣無垠雙澗流寒月千峰集暮雲路
盤塵境斷世系祖燈分却愧留題處猶須說見聞

送李廷評知福清縣

世閥茂儒紳閩甌寵命新縣圖遙盡海鄉樹密藏春祖
帳鷺將老登車雉已馴行聞趨召節舊美政如神

子規

一叫一春殘聲聲萬古冤疎烟明月樹微雨落花村易
墮將乾淚能傷欲斷魂名韉慚自束為爾憶家園

桂園蚤行

聞雞已行邁策馬便徘徊月色依山盡秋聲帶雨來自
堪悲玉璞誰復築金臺溥宦空羈束西齋長綠苔

山館

野館蕭條晚憑軒對竹扉樹藏秋色老禽帶夕陽歸遠
岫穿雲翠畝田得雨肥淵明誰送酒殘菊遶牆飛

送僧惠勤歸鄉

舊國起歸興三江一櫂輕夜吟逢月白曉渡趁潮平楚
岸雲藏寺吳宮水繞城美師塵外去何日濯吾纓

雙松

自古詠連理多為陽艷吟誰知抱高節生處亦同心風

至應交響禽棲得並陰歲寒當共守霜雪漫相侵

新息道中遇雪

寒深雪壓春去去祇傷神巢穴有歸鳥路歧無佳人遠
光天共白夜色月相親獨酌不成醉翻嫌名利身

靈樹喜長老屬疾見寄次韻酬之

鳴韶山下客多病似吾身每想彌天辯誰為問疾人泉
清偏照月松瘦不知春未遂尋高論遥遥一水濱

湘中送人

離謳方揭耳別緒已淒然草蔚湘纍浦花殘蜀魄天疑
山晴拂漢啼竹冷澄烟後夜思君意空歌皓月篇

慧照大師

已向南宗悟尤于外學精士林傳字法僧國主詩盟初
地形容古彌天語論清因啗支遁輩徒擅養鷹名

遊水南寺

雙刹聳浮雲層軒絕世塵松溪千蓋雨茶圃一旗春夜
梵龕燈暗朝香篆火新暫來猶永日堪羨白蓮人

暮春

草帶全鋪翠花房半墜紅農家榆莢雨江國鯉魚風堤
柳綿爭撲山櫻火共烘長安少年客不信有衰翁

送岳師歸贛川

千里起歸思翛然物外身海山經處霧梅嶺到時春藥
更開新楮庭應長舊筠年衰重方術聊此送行人

謹吟五十六字攀送仲求殿丞之任贛川竊惟嚴
君國博挂冠歸閒而仲求兄弟為鄰部守倅其

榮至矣誠欲賦述詞不逮意

一門纓組列西雝又見雙旌並訓農三釜親庭交祿養
夾河子舍接鄰封酒闌風雪催行色吟際江山助筆鋒
我亦思親求郡紱東湖南浦好過從

送劉學士知衡州

朱轡新命漢諸侯地扼荆湘占上游醺醑淥水聲侵古堞
祝融峰色入晴樓畫垂三組鄉邦過春擁雙旌獄寺遊
番直星垣歸緩步謫仙通籍著瀛洲

送楊學士益州路轉運

芝函新命直仙蓬
又見岷山叱馭忠
玉珮曉班辭日下
木牛秋粟轉褒中
花時井邑蠶叢富
徼外人
家棧道通
奇技刺文頻詔約
此行應更變民風

思壽陽寓居高氏園亭

嘗借芳園石友家
幽棲無復羨紛華
敞扉氣爽雲生壁
卷箔香微露泣花
桂向淮山分月魄
桃從秦洞得仙葩
別來追想清閒境
悔褫方袍走棧車

和邃卿張學士暑夕

危坐空齋暝色低，三金才伏火將西。
烟濛細草流螢度，月上疎林倦鵲棲。
荃葛野裳交羽扇，桔槔鄰圃響疏畦。
中宵爽氣奪炎熱，却笑班姬空慘悽。

送舒太博通判眉州

通守方忻再命新，東風疎雨拂行塵。
封疆遠入魚鳬國，歧路正逢蠶市春。
彭岫曉嵐迎畫隼，錦江晴綠照朱輪。
歸期不待更書至，舊有清名在縉紳。

落花

小園斜日照殘芳千里傷春意未忘金谷已空新步障
馬嵬徒見舊香囊鶯來似結啼紅怨蝶散應知夢雨狂
清賞又成經歲別却歌團扇寄迴腸

送張如京知安肅軍

賜戟銜恩出斗城塞門迢遞草初青新提司馬臨戎節
舊應哀鳥近極星叔子成吳長緩帶單于歸漢已空庭
圯橋自得家傳策不問人間太白經

和董職方見示初到番禺詩

五方殊俗古難并，千載猶存故越城。
客聽潮雞迷蚤夜，三更潮上人瞻颶母識陰晴。
波濤洶湧天邊濶，犀象爛即聞雞鳴。
煊徼外生太守，不才當遠寄惟憂。
南畝廢農耕。

遊應聖宮

驅羸遠遠出嚴闌，雲構祠宮絕世塵。
伴鶴不知龜甲子，
斲山多見藥君臣。
雨昏仙穴丹砂井，雲映樓居玉洞人。
只待策勲書竹帛，抽簪來此卜比鄰。

西山

萬壑千巖鬪物華，
楮節間訪道生涯。
一壇星斗修真館，
數里雲烟斲藥家。
魚戲竹溪寒影碎，
路穿松塢翠陰斜。
桃源自有神仙宅，
未信明河八月槎。

謝孫抗員外惠酒

白衣遠遠到江樓，
報道攜壺助勝遊。
醉眼便堪終日富，
離腸先破一春愁。
梅梢背嶺開猶晚，
雪片當風舞未休。
此景滿觴方得意，
不須千釀敵封侯。

馬當呼鷗不至偶成呈同行諸官

昔年曾泛馬當灣
團飯喚鷗篙楫間
今日江頭飛不下
應知人世足機關

端午日寄酒庶回都官

龍舟爭快楚江濱
弔屈誰知特愴神
家釀寄君須酌酹
古今嫌見獨醒人

五色雀

羅浮有五色雀
各被方色非時
不見若士大夫
將遊

是山則先入羣翔寺僧以是為候某庚辰歲謫官來
遊將至之夕茲雀亦集感之成詠云

五方純色儼衣冠應是山靈寄羽翰多謝相逢殊俗眼
謫官猶作貴人看

陳堯佐

字希元蜀閬中人進士及第為魏縣中牟尉作海
喻一篇人奇其志遷秘書郎知真源縣開封府司
錄參軍事轉府推官坐言事忤旨降通判潮州召
還直史館知壽州歷兩浙轉運副使徙河東京西
入為三司戶部副使擢知制誥史館修撰知通進
銀臺八翰林為學士拜樞密副使同中書門下平

章事集賢殿大學士以太子太師
致仕卒贈司空謚文惠集三十卷

昭慶寺

湖邊山影裏靜境與僧分一榻坐臨水片心閒對雲樹
寒時落葉鷗散忽成羣莫問紅塵事林間肯暫聞

西湖

附郭水連山公餘獨往還疎烟漁艇遠斜日寺樓閒繫
馬芭蕉外移舟菡萏間天涯逢此景誰信自開顏

吳江

平波渺渺烟蒼蒼
菰蒲纔熟楊柳黃
扁舟繫岸不忍去
秋風斜日鱸魚香

湖州

苕溪清淺雪溪斜
碧玉光寒照萬家
誰向月明終夜聽
洞庭漁笛隔蘆花

題潮州韓木亭

侍郎亭下草離離
春色相逢萬事非
今日江山當日景
多情直擬問斜暉

華清宮

百首新詩用意精不尤妃子不尤兵須知一向傷心事
都為明皇恃太平

呂公著

字晦叔幼嗜學至忘寢食父夷簡器之曰他日必
為公輔登進士第名試館職不就通判潁州入判
吏部南曹仁宗獎其恬退除崇文院簡討同判太
常進知制誥三辭不拜改待制兼侍讀英宗初加
閣直學議起力言稱皇考之非與執政左乞補外
知蔡州神宗立召為翰林學士知銀臺以爭司馬
光罷中丞自請解職知開封府青苗法行公著極
言其不便且劾呂惠卿姦邪忤王安石出知潁州

起知河陽召為翰林學士承旨改端明知審官院
移疾去位安撫定州徙揚州加大學士哲宗立以
侍讀還朝上十事拜尚書左丞門下侍郎元祐元
年拜右僕射兼中書侍郎與司馬光同心輔政三
年以司空同平章軍國事宋興宰相用三公平章
重事者纔四人而公著與父居其二士論榮之薨
年七十二贈申
國公謚正獻

分題得瘿壺

天地產衆材任材謂之智
榱桷與楹杙小大無有棄
方者以矩度圓者中規制
嗟爾木之瘿何異肉有贅
生成擁腫姿賦象難取類
隱括所不施鈎繩為爾廢
大匠晚

而往惻然乃有意孰非造化工而終朽不器剗剔虛其中朱漆為之賁輶漿挹酒醴施用惟其利犧象非不珍金鼎豈不貴設之于楹階十目肯注視幸因左右容反見謂竒異飾陋就其長能通天下志

呂公弼附

字寶臣司空夷簡仲子公著之兄也先是司空殁仁宗終念之已問知公弼才甚喜識其名於殿柱及擢知成都軍府肅然為羣牧使英宗居藩得賜馬苦劣請易之不可後即位召為三司使曰三司主出納我曩請馬卿不與可守是官矣神宗立進樞密使憤新法之病民將為上力陳其不便草奏

成未入而從孫呂嘉問預竊其稿以示王安石安石怒立出公弼於外任呂氏因呼嘉問為家賊云
琴臺

烟樹重城側琴臺千古餘
蚤為梁苑客晚向茂陵居
賦給尚書筆歸飛使者車
清風覲舊隱長目聳鄉閭

呂希哲附

公著子字原明少從諸儒講學絕意進取以父蔭入官終父喪始授兵部員外郎其妹婿范祖禹嘗于哲宗前言希哲經術操行可備勸講名為崇政殿說書擢右司諫不拜黨論起以秘閣校理知懷州分司南京居和州徽宗立以秘監召改光祿少卿請外知曹州旋遭崇寧黨禍奪職羈淮泗間十

餘年卒其兄希純立朝
正直為李清臣所排

大雪侍講筵

水晶宮殿玉花零
點綴宮槐拂素屏
特勅下簾延墨客
不因風雪廢談經

葉清臣

字道卿蘇州長洲人天聖二年進士主司竒所對策擢第二宋士以策擢高第者自清臣始也授奉禮郎簽書蘇州觀察判官事歷通判太平州知秀州入判戶部勾院改鹽鐵判官出知宣州累遷太常丞進直史館知制誥知審官院國子監屢上章言事上謂其才可用擢起居舍人龍圖閣學士權

三司使公事宰相陳執中素不悅清臣出知邵州
因請對改潭州徙知永興軍會仁宗出手詔求言
清臣條對極論時政闕失復召為翰林學士皇祐
元年奏備邊之策請發大名庫錢以佐邊糴而安
撫使賈昌朝格詔不從清臣固爭宰相方欲兩中
之徙昌朝鄭州罷清臣知河陽卒贈左諫議大夫
集一百
六十卷

董永

董生少失母老父鰥且貧無田事耕稼客作奉晨昏朝
推鹿車去大樹為庭藩農家乏甘旨糠粃苟自存父死
不得藏粥身奉九原人道孝為本畎畝知所尊傷嗟世

教薄至行豈足論廩祿厚妻子搆拊遺其親靳吝一杯
土因循三尺墳空令丘壑間凜凜慙英魂

憫農

五月雨未沛吾民耕固遲中秋霜蚤至我稼颯其萎膏
澤歎苦晚芄苗惜遽衰盈疇皆秕稗卒歲誤京坻國謝
三年蓄人悲一頃算編齊陳牒訴奔走失程期縣籍拘
常制官征有定規勞歌不可繼為作憫農詩

送梵才大師歸天台

江水望不極楊花江面飛春風自無定遠客又言歸景
勝詩逾老心冥語亦稀從來林下意為謝北山薇

曾致堯

南豐人登進士第官西川安撫文集二百卷以孫
布貴追封密國公子五人易簡易占最知名而輩
布肇俱易占之子

東林寺

江南楊柳春日暖地無塵渡口驚新雨夜來生白蘋晴
沙鳴乳雁芳草醉遊人向晚前山下誰家賽水神

劉氏江樓

劉氏江樓雅詩家不易言春風花對岸夜月水當軒

晁端友

字君成濟州鉅野人少傳晁迥四世孫也工於詩其子補之及羣從皆承家學有詩名曾倅杭州時蘇軾為通判故補之年十七即見知於軾云

蚤行

馬上雞初唱天涯星未稀驚風時墜笠零露暗沾衣山下疎鐘發林梢獨鳥飛遠峰烟靄澹迤邐見朝暉

馬處厚席上探得蚤梅

嶺梅何處蚤雪裏看芳菲
北陸寒猶在南枝春已歸
曉妝初見妒殘角未成飛
引我江頭夢清香憶滿衣

登多景樓

樓上無窮景樓前正落暉
開軒跨寥廓覽物極纖微
雲破孤峰出潮平兩槳飛
東溟看月上西渡認僧歸
木落吳天遠江寒越舶稀
魚龍鄰海窟雞犬隔淮圻
草色迷千古波聲蕩四圍
廢興懷霸業融結想天機
浩浩羣流

會沈沈百怪依登臨真偉觀回首重欷歔

仲 訥

字樸翁定陶人景祐元年進士由英州防禦推官擢大理寺丞三遷為尚書屯田員外郎卒年五十
五訥喜讀書為古文詞晚尤好為詩其詩有名於世蓋王介甫誌之如此

送唐御史

力犯雷霆衆共危遠投魑魅獨為宜忠州學業真無負
高廟神靈固有知自倚聖明容直道未甘憔悴死荒陲
滿朝卿相多公議莫把文章作楚詞

負暄閒眠

茅簷晴日暖如春一枕釣天樂事新
滿眼繁華皆得意
午眠安穩却無人

李師中

字誠之楚丘人年十五上封事言時政舉進士知
洛川縣用龐籍薦召對轉太子中允知數政縣主
管經畧司文字提點廣西刑獄召啟邊釁者難之
屈其議境賴以安邊人化之肖像立祠稱為桂州
李大夫不敢名還知濟兗二州遷直史館知鳳翔
府歷河東都轉運使知秦州持重總大體深得戰
守機宜因與王韶議邊事不合忤王安石意出知
舒州稍復待制知瀛州再貶和州團練副使卒年

六十六師中具王佐才以好大言不容于世王安
石知鄞縣時師中即知其能亂天下蓋有過人之
識也

送唐介之貶所

孤忠自許時不與獨立敢言人所難去國一身輕似葉
高名千古重如山並遊英俊顏何厚未死姦諛骨已寒
天為吾皇扶社稷肯教夫子不生還

按裨史唐子方復因潞公薦官

於朝無所建白師中從子方索還前詩子方無以報但
取詩還之曰我固不用出韻詩也蓋謂山寒二字同押
云

楊偕

字次公坊州中部人少從种放學於終南山舉進士授坊州軍事推官知汧源縣調漢州判官上書論陝西邊事召試不赴即遷著作佐郎為審刑院詳議官歷太常博士殿中侍御史進龍圖閣直學士知河中府屢與陝西經略使夏竦爭募上兵之非彼此交奏不為少屈進樞密直學士知并州所論八陣圖及進神楯勞陣刀朝廷善之下其法於諸路往往賴以破賊遷翰林學士知審官院因議元昊乞和許不稱臣為諫官所劾出知杭州還為右諫議大夫請老以工部侍郎致仕卒有集十卷

郡舍偶書

偃息鈴齋度歲華
著書人盡笑聲牙
斯文自信驚天地

吾道誰知繫國家獨愛杉篁寒不變更憐江海濶無涯
因思朝市爭名地何似優游刺史衙

傅堯俞

字欽之本鄆州人徙濟源未冠登第知新息縣遷
太常博士歷監察御史於內侍之不法者悉劾之
直聲大著英宗即位轉殿中遷起居舍人上書請
太后還政遂任守忠皆有力焉知諫院英宗眷遇
特厚以濮議不合丐外任出知和州神宗即位徙
廬州王安石素與之善欲援以助己虛待制處之
堯俞極論新法不便安石怒但授直昭文館俄出
為河北轉運使改知江寧府再歲六移困於道路
知不為時所容請提舉崇福宮哲宗立以祕監召
累陞御史中丞爭留御史張舜民不聽請知陳州

未幾復原職元祐四年拜中
書侍郎卒年六十八謚獻簡

讀書

吾屋雖喧卑頗不甚蕪穢置席屋中間坐卧羣書內橫
風吹急雨入屋灑我背展卷殊未知心與古人會有客
自外來笑我苦癡昧何致雨侵衣屢問我不對必欲窮
所因起答客亦退聊復得此心沾溼寧足異

袁陟

字遜翁南昌人鹽鐵副使袁抗之子刻勵好學善
為詩終殿中丞晚卜居梅嶺之雲溪距郡三十里

宿簡寂觀

名山崇祕祠終夜得清賞真氣溢空浮流泉隨砌響林
巒片月散殿閣高風行天際斗杓直庭中盤石橫

即陸高真

朝斗之石

逸人今何之故嶺不改秀白鶴唳松梢青燈見在

竇悅追汗漫駕深悟逍遙言四顧羣動寂冥心歸灝元
再遊雲居

風吹嶺頭樹似欲招行客緣雲過絕頂復見紫霄宅平
觀三百里下視八千尺五老鎮相望西岫天與敵可笑

培塿羣亦自矜寸碧氛埃轉宇宙雁鷺下川澤危亭據
中峰回抱竦天壁沈沈古帝坐左右列夔稷舉頭河漢
通直欲攀南極合奏天地籟兩耳清歷歷吁嗟萬類微
胡為競朝夕安知太清上我方適所適尚思西嶽路去
冬躡雙屐高興挹洪厓大句鼓天力到今巖壑間浩浩
起金石安得少陵翁物外講新格重來羈靽在欲隱世
累迫多謝受命松長存歲寒色

宴坐巖

霜露凝空白松杉歛翠陰
泉聲月中冷山色暝來深

宋元詩會卷十六

欽定四庫全書

宋元詩會卷十七

兵部主事陳焯編

蘇洵

字明允眉州眉山山人年二十七始發憤為學歲餘應舉不中悉焚常所為文閉戶益讀書遂通六經百家之說下筆頃刻數千言至和嘉祐間與其二子軾轍皆至京師翰林學士歐陽修上其所著書二十二篇既出士大夫爭傳之一時學者競效蘇氏為文章矣宰相韓琦請於朝召試舍人院辭疾不至遂除秘書省校書郎復以霸州文安縣主簿同修太常院禮書書成方奏未報卒特贈光祿寺丞

有文集二十
卷謚法三卷

有驥在野

有驥在野百過不呻子不我良豈無他人繫我于廐乃
不我駕遇我不終不如在野禿毛于霜寄肉于狼寧彼
我傷寧人不我顧無子我忘

朝日載昇

朝日載昇薨薨伊氓于室有績于野有耕于塗有商于
邊有征天生斯民相養以寧嗟我何為踽踽無營初孰

與我今孰主我我將往問安所處我

我客至止

我客至止我迎于門來升我堂來飲我樽羞斂不時詈
我不勤求我何多請辭不能客謂主人唯子我然求子
之多責子之深期子于賢

顏書

任君北方來手出邠州碑為是魯公寫遺我我不辭魯
公賢豪傑慷慨忠義姿憶在天寶末變起漁陽師猛士

不敢當儒生橫義旗感激數十郡連衡鬪羗兒新造勢
尚弱胡為力先衰用兵竟不勝歎息真數竒果兄死常
山烈士淚滿頤魯公不死敵天下皆熙熙奈何不愛死
再使踏鯨鰭公固不畏死吾實悲當時緬邈念高誼惜
哉生我遲近日見異說不知作者誰云公本不死此事
亦已竒大抵天下心人人屬公思加以不死狀慰此苦
歎悲我欲哭公墓莽莽不可知愛其平生迹往往或了
遺此字出公手一見減歎咨使公不善書筆墨分訛癡

思其平生事豈忍棄路岐況此字頗怪堂堂偉形儀駿
極有深穩骨老成支離點畫迺應和闊連不相違有如
一人身鼻口耳目眉彼此異狀貌各自相結維離離天
上星分如不相持左右自綴會或作斗與箕骨嚴體端
重安置無欹危篆鼎兀大腹高屋無弱捐古器合尺度
法物應矩規想其始下筆莊重不自卑虞柳豈不好結
束煩帶羈一車會百木斤斧所易為團團彼明月欲畫
形終非誰知忠義心餘力尚及斯因此數幅紙使我重

吁嘻

歐陽永叔白兔

飛鷹搏平原禽獸亂衰草蒼茫就擒執顛倒莫能保白
兔不忍殺歎息愛其老獨生遂長拘野性始驚矯貴人
織筠籠馴擾漸可抱誰知山林寬穴處頗自好高颺動
槁葉羣竄迹如掃異質不自藏照野明曷曷獵夫指之
笑自匿苦不早何當騎蟾蜍靈杵手自搗

送陸權叔提舉茶稅

君家本江湖南行即鄰里稅茶雖冗繁漸喜官資美嗟
君本篤學寤寐好文字往年在巴蜀憶見春秋始名家
亂如髮焚錯費尋理今來未五歲新傳兩盈几人言欲
治易雜說書萬紙君心不可測日夜湧如水何年重相
逢祇益使余畏但恐茶事多亂子易中意茶易兩無妨
知君足才思

丙申歲余在京師鄉人陳景回自南來奔其官得
太子中允景回舊有地在蔡今將治園圃於其

間以自老余嘗有意於嵩山之下洛水之上買地築室以為休息之館而未果今景回欲余詩遂道此意景回志余言異日可以知之非戲云

爾

岷山之陽土良腴江水清滑多鯉魚古人居之富者衆我獨厭倦思移居平川如手山水感恐我後世鄙且愚經行天下愛嵩嶽遂欲買地居妻孥晴原漫漫望不盡山色照野光如濡民生舒緩無天扎衣冠堂堂偉丈夫

吾今隱居未有所更後十載不可無聞君厭蜀樂上蔡
占地百頃無邊隅草深野濶足狐兔水種陸取身不劬
誰知李斯顧秦寵不獲牽犬追黃狐今君南去已足老
行看嵩少當吾廬

送王吏部知徐州

東徐三齊之南鄰夫子豈是三齊人辭鶯乞靜得此守
走兔入藪魚投津徐州絕勝不須問請問項籍何去秦
江山雄豪不相下衣錦遊戲欲及晨霸王事業今已矣

但有太守朱兩輪還鄉據勢與古並豈有漢戟窺城闌
論安較利乃公勝行矣正及汴水春

文同

字與可梓潼人漢文翁之後方口秀眉以學名世
操韻高潔自號笑笑先生善詩文篆隸行草尤工
畫竹文彥博守成都奇其才司馬光蘇軾尤相敬
重軾固同之中表弟也舉進士官集賢校理知陵
州洋州元豐初知湖州至陳州宛邱
驛忽留不行沐浴衣冠正坐而卒

起夜來

曉牕明綠紗蜀錦壓春卧橫腮虎魄冷驚起新夢破玲

龍轉條脫縹緲梳倭墮高軸響銀牀時誤君車過

積雨

京師值積雨浮淖皆滿城況當洶決時左右羅深坑有
客南河居旦夕隄上行病僕挾羸馬十步八九傾職事
有出入長抱落膽驚都人素豪恣小官常見輕排闥要
穩道歛避不敢爭試欲效呵止園目根姓名往往被濺
汚直落舌與晴歸來事洗濯袍袴分縱橫仰首問天公
春澤當早晴幸有好日月何惜施光明

西岡就居

出官在秦蜀始末凡十年所治得公宇靡不完且堅中
堂與夾廊角翼相鈎聯領屬僅十口出處皆安便冬夏
惡風日侵薄曾無緣今年歸中都職事叨磨鉛未免僦
屋住敢謂須華鮮西岡頗幽僻愛此遠市廛問得王氏
居十楹月四千牀榻案几外空處無一椽區溷及井竈
圻壁皆相連經卑湏俛首過隘常側肩所謂十口者日
繞蝸殼旋前時大暑中幾不禁袪延鬱若鼎釜炊局如

狴犴攣走蝎過亂蟻飛蚊劇羣蟬今日幸過之復畏明
日然喜見白露節相賀肌肉全如何下淫雨曉夕常綿
綿瓦破榱桷漏柱陷墻垣穿惟供改席坐豈暇安枕眠
中庭止數步深已可載船盡室徒跣行一起復一顛京
師費耗地居止實重遷俸料計月入外得無幾錢却思
已過分僅免親犁田自望于古人若地而升天小廬焦
生高陋巷顏子賢引之諭妻孥吾道宜此焉猶勝比鄰
者寒突無晨煙

翡翠

清晨有珍禽翩翩下魚梁其形不盈握毛羽鮮且光天
人裁碧霞為爾縫衣裳晶熒炫我目非世之青黃愛之
坐良久常恐瞥爾翔忽然投清漪得食如針鋸如是者
三四厭飫已一朘既飽且自嬉翻身度回塘飛鳴逐佳
匹相和音琅琅是時鳬與鴈狼籍島嶼旁滿腹醲腥穢
紛紛晒晴陽鷺鷥最麤惡背大脚脰長入水捕蛇鰻淤
泥亦銜將想其見爾時一喙亦爾傷其心肯謂爾被體

凝華章勸爾慎所止好醜難同鄉行當事澡刷帝圃參
鸞凰

貧居

繩牀擁敝裯初起髮未擲南牕展書卷就暖讀寒日門
前絕車馬薄暮垂片席短牆挂纖蔓幽鳥啄紅實羣蝸
惡積雨繚繞篆空壁男兒處貧賤舉首宇宙窄翩翩搶
榆鳩宛轉匿絮蟲妻奴競相笑憔悴守文筆

冷餅

海南有陶器質狀矮而橢云初日炙就鍛鑠不以火水
壺醜突兀酒甌肥磈砢山壘頸微腫石鼎足已跛圓如
鴟夷形大比康瓠顆華元腹且皤王莽口何哆外貢入
中原萬里隨大舸攜之五羊市中匱費包裹殊儺講其
效瀉辯若炙輶課以沸泉沃冰雪變立可炎歊療中渴
其用豈么麼君凡幾錢得不惜持遺我曾將對佳客屢
試輒亦果勿云遠且陋幸可置之左

織婦怨

擲梭兩手卷踏繭雙足趼三日不住織一疋纔可剪織
處畏風日剪時謹刀尺皆言邊幅好自愛經緯密昨朝
持入庫何事監官怒大字雕印文濃和油墨汚父母抱
歸舍拋向中門下相看各無語淚迸若傾瀉質錢解衣
服賈絲添上軸不敢輒下機連宵停火燭當須了租賦
豈暇恤襦袴前知寒切骨甘心肩胛露里胥踞門限叫
罵嗔納晚安得織婦心變作監官眼

採蓮曲

綠纈襠紅繡裳衫盤蜂蝶裙駕鴛雕瑰錯寶垂鬢長紫
冒翠蓋行新粧蹁躑曲堤下回塘畫橈送入波中央羅
袖卷起金釧光搖輕撼脆敲短芒丹瓊紺玉低復昂霑
裊薄粉撲嫩黃蠶腰蛛腹輕飄揚列坐綵舫求比方笑
聲吃吃動明璫挨蒲拂蓼次岸旁風吹落霞供晚涼西
城鴟鴞啼女牆歸來索酒酌滿觴吳屏蜀帳圍象牀困
卧不起燈燭張琉璃盞缶叢生香

朱櫻桃

金衣珍禽弄深樾禁藥朱櫻斑若頰上幸離宮促薦新
藤藍寶籠貂璫發凝霞作丸珠尚輓油露成津蜜初割
君王日午坐倚蘭翡翠一盤紅鞵鞬

惜花

游蜂採花花氣薄黃鳥啄花花蘂落林風吹花花片亂
池水浸花花色惡少年惜花會花意晴張青幃雨油幕
勸君直須為花飲明日春歸空晚萼

採藥歸晚因宿野人草舍

東陟陰深崖巘古夾澗垂泉結鵝乳我來採藥晚忘歸
試宿荆扉問雞黍春風滿林燈火冷一夜不眠山月苦
平明攜策下青蒼松葉紛紛灑新雨

蒲生鍾馗

寒風酸號月慘苦梟飛狐鳴滿墟墓叢棘亂礪翳野霧
古社禿剝倒枯樹下有三鬼相嘯聚初行誰家作疰忤
痛熱腫痒快嘔吐塞噎咽喉脹臍肚呼巫召覲使咒詛
翁驚嫗忙設賽具茅盤草船置五路飯盂炙串狼藉布

相共收斂各執去方此危坐歔且哺忽爾相視生畏怖
有神傑然駕巨牯前呵後擁役二豎此神噉鬼充旦暮
其腹尚餒色躁怒鬼遙見之悉失措竄匿不暇相告諭
酒傾肉落雜穢汙魂魄飛蕩身偃仆一入木底只四據
一尚把盞愕以顧一自隱蔽捩眦覷神用氣攝縛束固
前死人吻無十步計之嚼嚙或味飫蒲生胡為適爾遇
畫之蒲卷無一悞筆墨醜怪實可懼持以贈余子何故
揺手不取一錢賂他日乞詩者尤屢試為言之寓其故

往年寄子平

即子瞻

往年記得歸在京日日訪子來
西城雖然對坐兩寂寞
亦有大笑時相轟顧子心力苦
未老猶弄故態如狂生
書牕畫壁恣掀倒脫帽褫帶隨
縱橫誼歌詩詔文字
蕩突不管鄰人驚更呼老卒立
臺下使抱短簫吹月明
清歡居此僅數月夜夜放去常
三更別來七年在鄉里
已忝三度移雙旌今茲惛惛意
思倦加以跼跼疾病嬰
每思此樂一絕後更不逢人如
夜行

遣興效樂天

君莫學楊虞卿奉李宗閔宗閔權勢豈能久君莫學劉
栖楚附李逢吉逢吉祿位寧長守雖然一時身暫好其
奈千古名常醜丈夫讀書要知道所信不篤被其誘大
張富貴作羅網愚者紛紛以身就左纏右繞不可脫誅
竄還當逐其後君不見虞卿須遇李固言君不見栖楚
終遭韋處厚一朝摧折靈氣盡龍如蛇兮虎如狗勸君
聖賢術內好潛心勸君邪佞黨中休入手豈不知潞州

處士田佐時喚與美官嫌不受

田舍

園林曉氣清
籬巷夕陽明
石竇聞寒碓
煙坡見晚耕
豚蹄供禱賽
龜殼問陰晴
欲識豐年樂
村村雞犬聲

春閨

枕帶縈春意
牕紗漏曉光
蠅蛸傷遠別
鶼鶒感流芳
粧匣蒸殘粉
熏爐試舊香
洞房燈燭外
只有夢悠揚

書隱者壁

枳棘分三徑，猿猴結四鄰。
茂林脩竹地，枕石漱流人。
看雨搯藤杖，迎風卸葛巾。
我來懷愧甚，衣上有紅塵。

彭山縣居

公館靜寥寥，園亭景物饒。
溪光明短舸，樹影蔭危譙。
山鳥忽雙下，池魚時一跳。
主人王事簡，文酒日逍遙。

屬疾梧軒

高梧覆新葉，滿院發華滋。
白日一何永，清陰間自移。
暖蟲垂到地，晴鳥語多時。
病肘倚枯榻，泊然忘所思。

睡起

寥寥公館靜門掩似山家竹簟屢移枕石盤頻浸花間
多新得策事少早休衙一覺高春睡誰來伴試茶

過友人谿居

籬巷接菰蒲閒扉掩自娛水蟲行插岸林鳥過提壺白
浪搖秋艇青煙蓋晚厨主人誇野飯為我煮新蘆

極寒

燈火宜冬杪圖書稱夜長簾鈎挂新月牕紙漏飛霜酒

醜慙孤宦皮毛逐異鄉誰知舊山下梅艷滿東牆

六月十日中伏玉峰園避暑值雨

南園避中伏意適晚忘歸牆外谷雲起簷前山雨飛興
餘思束燭坐久欲添衣為愛東窗下泉聲通翠微

訪李真山人隱居

多暇無所適故來尋隱君
寡開壓屋樹觸散擁門雲
狀貌不妨古言談何太文
令人重高趣歸去毋斜曛

面川亭

幽亭最孤絕直入亂叢間近晚獨來此有誰相與閒
卷
簾通大野臨檻數前山便欲教攜酒陶然踏月還

山堂偶書

幾日無公事山堂興頗清和詩防積壓丸藥趁晴明
石新稜出澆蔬晚甲生此皆忙外得低首笑塵纓

寄子駿運使

西鄉巴嶺下險道入孱顏使騎到荒驛野禽啼亂山
問
民青靄裏訪古白雲間幾日南充路新詩滿軸還

宜祿昭仁寺後軒

危欄憑絕壑欲奈此時何但有夕陽處就中秋色多與
誰同徒倚空自發吟哦便覺成羈旅歸心逐雁過

寄楞嚴大師

錦官城裏寺一室若雲峰水縮秋吟鼎霜低夜講松住
齋塵入鉢出定蘚生筇曾聽三摩義居常夢曉鐘

臨闌閣

絕壑迎朱檻高林拂畫楹卷簾千嶂遠入座一川平峴

采綵雲斷霞光射水明不須誇曠望為語謝宣城

東谷茅齋

野徑轉深密靜無車馬痕松花金粉墮茗葉翠茸翻蟲
鳥春音雜煙雲晚色昏俗塵何處入長是掩谿門

梅

寒梅引舊枝映竹復臨池朶露深開處香聞瞥過時凌
兢侵臘雪散漫入春詩贈我歲寒色憐君冰玉姿

宿雲屏山寺

翠嶺聳雲端巉巖走復蟠客從塵外入僧向畫中看月
上千崑碧風生萬木寒平明惜歸去猶待一凭欄

野逕

山圃饒秋色林亭近晚晴禽蟲依月令藥草帶人名排
石鋪衣坐看雲緩步行官閒惟此樂與世欲無營

寄張郎中

常媿無才動有權十年鄉里但留連養成答颯人應笑
學得支離自謂賢三館舊遊層漢上一麾今守亂峰前

幸逢別駕如張軌
免對蘇章說二天

送楊山人歸綿竹

一別江梅十度花
相逢重為講胡麻
火鈴未降真君宅
金鈕曾盟大帝家
道氣滿簪凝綠髮
神光飛鼎護黃芽
青驪不肯留歸馭
又入無為嚙曉霞

依韻和張推官元夕

山郡上元榮樂事
大開金地作遨場
煙雲向曉誰教霽
燈燭乘春自有香
紫陌熒煌隨步遠
綵棚佳麗鬪眉長

遊人莫惜酬高直
買取銀蟾一寸光

紅樹

萬葉驚風盡卷收
獨餘紅樹擬禁秋
已疑斷燒生前嶺
更共殘霞入遠樓
楓岸最深霜未落
柿園渾變雨初休
勸君莫上青山道
裝點行人分外愁

送王恪司門知絳州

絳守園池天下誇
紹述有記詞聲牙
蒼官青士左右樹
神君仙人高下花
遠水依然尚鈎帶
舊門想已無韉櫪

自憐俗狀不能到此去美君專宴衙

送張宗益工部知相州

學術深沈久未施晚登臺省世方知詩章好奏周文廟
字法宜摩魏武碑禁掖便當提大筆名藩猶自擁高麾
應憐共試金坡者答颯渾如鄭鮮之

依韻和蒲誠之春日即事

輕煙漠漠雨斜斜無事常教放兩衙問客江邊求好石
倩人山裏覓奇花新疏宛宛生晴圃淺溜涓涓出暖沙

入夏盃盤須准備
繞畦親灌邵平瓜

北齋雨後

小庭幽圃絕清佳
愛此常教放吏衙
雨後雙禽來占竹
秋深一蝶下尋花
喚人掃壁開吳畫
留客臨軒試越茶
野興漸多公事少
宛如當日在山家

送潘司理秘校

已自多時賦式微
五峰佳景夢長飛
四年遠地為官去
萬里高堂喜客歸
下馬便呈新授勅
開箱爭認舊縫衣

鄉人覓次來相賀
蓴菜鱸魚正輭肥

山城秋日野望感事書懷詩呈吳龍圖

已是秋陰更夕曛
亂山高下起寒雲
危樓願見客何處
遠笛不知人厭聞
身外流年波渺渺
眼前生事葉紛紛
此愁萬斛誰量得
直為重拈庾信文

成都楊氏江亭

汀洲煙雨卷輕霏
遙望軒牕隱翠圍
萬嶺西來供曉色
一江南下載晴暉
鳬鷗慣入闌干宿
魚蟹長隨蚱蜢歸

我亦舊多滄海思幾時如此傍苔磯

晚至村家

高原磽确石徑微籬巷明滅餘殘暉舊裾飄風採桑去
白袷卷水秧稻歸深葭繞澗牛散卧積麥滿場雞亂飛
前谿後谷暝煙起稚子各出關柴扉

早晴至報恩山寺

山石巉巖磴道微拂松穿竹露沾衣煙開遠水雙鷗落
日照高林一雉飛大麥未收治平聲圃晚小蠶猶卧斫桑

稀暮煙已合牛羊下信馬林間步月歸

運判南園瞻民閣

青都高與紫霄通獨此危欄望不窮萬嶺迫雲秋色裏
一峰擎雪夕陽中欄楹曉落天倉月牕戶晴吹石闕風
民吏安閒財賦足管絃時復在層空

觀音院怪松

怪松屢見無如此每度來觀說向僧若遇風雷宜守護
恐生頭角便飛騰秋聲遶殿隨齋磬夜影侵廊對佛燈

韋僊畢宏今不在欲求人畫有誰能

提葫蘆

花開已堪摘酒熟正好沽
山禽會人意勸我提葫蘆

獨坐

不報門前賓客已收案上文書獨坐水邊林下宛如故
里間居

鷺鷥

避雨竹間點點迎風柳下翩翩靜依寒蓼如畫獨立晴

沙可憐

北郭

繞樹垂蘿蔭曲堤
暖煙深處亂禽啼
何人來此共攜酒
可惜拒霜花一谿

詠史

不得滎陽遂失秦
始知成敗盡由人
可憐一擲羸天下
只使黃金四萬斤

郡學鐫宿

長栢高栢陰廣庭夜涼人靜夢魂清不知山月幾時落
每到曉鐘聞雨聲

長舉驛樓

爽氣浮空紫翠濃隔江無限有奇峰君如要識營丘畫
請看東頭第五重

折楊柳

垂楊百尺臨池水風定煙濃盤不起欲折長條寄遠行
想到君邊已憔悴

楊甲

字鼎卿四川重慶府昌州人今大足縣所著有六經圖藏州學中

出東郭見山

二年不見山見之喜不休舉手三揖之山遠不領頭疑我墜塵土已與俗同儔稍稍望雲脚下見八九丘近前與之笑顏色漸和柔迎我以松風與我相獻酬憐我不識路導以溪水流豈其終愛予為此世所仇一官最下策包裏辱與羞百年在平地亦有一日憂誰能無饑渴

往與青山謀

合江泛舟

莫踏街頭塵寧飲城東水江邊放船去葦間問漁子岸
深魚有家鳬雁在中汴得酒可以歌得樹可以艤年年
舟中客顏色不相似風波無前期遊者亦如此短篙醉
時策遠山卧後几老我不奈醒日落西風起

謁朱真人祠

一濯巖下溪再拜巖中庭清風瀟然來吹我衣上腥仙

人芙蓉冠乘月下雲輶山空雜佩響靜夜朝百靈寂寥
古壇外但見斗與星青山無行迹露雨空冥冥

遊長松寺宿石門僧舍

疾風吹輕衣駕我雲脊路人間一回首驚絕不敢顧鳥
投虛無底渺渺不知處蜂窠蟻丘垤與世同所驚試看
一蒼莽誰有不平慮尚憐野僧屋佛面荒苔蠹斷崖劃
呀吻洶崩石怒我來得奇觀拄杖叩巖樹青山有驕
色斯客不能句平生二三子慰我一相遇娟娟松間月

幽夕亦可度夜闌更小語風逼遺響去酌君無多酒
繼以木蘭露

臘日遊梅龍得樹字

年年看梅水西路白頭溪翁眼如故重來攀髯老不死
我亦風埃憶歸去酒酣百怪入我腸夜半恍惚與龍遇
醉騎一尾天上歸陳迹江頭不知處梅花勸汝一杯酒
千歲寒凝真旦暮欲將老大傲風雪穴蟻窠蟲已無數
成都萬事更奇古石筍猶疑卿相墓孔明廟前朽千尺

神物脩脩泣幽樹他時滅壞亦同歸人生誰能一長顧

靈泉山中 五首

小縣相籠合濛濛數百家果蔬爭晚市樵牧亂晴沙落
日平江迴青山細路賒偶居無事在隨意問桑麻

勝地仙靈宅微官也謫居焚香他日夢隱几向來書小
睡便山雨長齋稱野蔬逢人問無恙滿意說樵漁

何處長松寺雨花雲外臺山從百曲轉路入九關回老
檜成龍盡殘柯借鶴來人間斤斧亂風壑夜聲哀

野色山圍盡風煙更可憐客情牛鐸外農事藕花前聚
汲松根井寬愁石底泉雲安須斗水詩興亦超然

日下叢林薄芊芊雨晚暉閉門成小隱飲水亦生肥醉
著溪藤杖歸來木葉衣狂歌有虎兕吾道只應非

何耕

字道夫任潼州提刑
詩見四川名勝志

青羊宮

一再宮錦城咫尺望琳宮未始得得來正坐役役中今

朝弄晴雨策蹇隨春風頗愛意象古停驂小從容縹緲
百尺臺突起凌半空憑欄俯修竹決眚明孤鴻信哉神
仙宅不受塵垢蒙稽首五千言衆妙一以通靜觀萬物
復豈假九轉功區區立訓詁亦哂河上公癡人慕羽化
心外求鴻濛要騎白鶴背往訪青羊蹤

題郭信可隱居雲溪

幽居定何如頗恨未見之主人向我言喜色融雙眉修
篁流翠陰寒溪漾清漪領略非一狀幽妍發餘姿

龍淵

門前大江何渺漫昔人飲牛水為乾水乾龍逝亦其理
近在咫尺聊泥蟠魚蝦玩侮獧獧笑縱有靈怪誰當看
德人問舍壓吾境便爾築室相遮攔坐令異類皆屏伏
恃有此耳差少安却紆朱紱去監郡遣我守舍良獨難
昨來過門恍如夢龍致此語催歸鞍先生不信反不笑
謂我饒舌狂豐干

虛舟

君不見江皋車馬紛相送
巨觴戔戔盈載重西南使者
解官歸水淺著沙牽不動
如君材具豈多得合侍明光
參法從胡為淺瀨著虛舟
頗肖胸中太空洞問君此意
竟安在欲說向人誰與共
山林鐘鼎本同轍繫岸截江
隨所用八牕窅窅淨無塵
一水泠泠清可弄何當抱被
過君眠分破江天幽夜夢

自合江亭過渡觀趙氏園亭

喚舟芳草渡繫馬綠楊陰
步入莓苔徑門開花竹林
王

孫隨蝶遠婆女隱雲深想見西南望悠悠空賞心

春日 二首

寂寞城南寺三年寄索居折花修佛供持鉢乞僧餘
竟日無車騎依時認鼓魚九衢塵一尺吾自有華胥

門前無俗物城上亦奇觀花浪東流穩雲山西望寒
身凌塵外遠目極境中寬最愛風標客晴沙理素翰

寒碧亭

憑欄日日俯清湍洗竹年年斬惡竿十頃琉璃秋色靜

一林芋賴曉聲寒涼風有意生天未明月無邊照水端
誰謂過清難久處愚溪元自不相安

遠色閣


小小樓居著散仙淵明真趣本悠然招呼雲月欄干曲
顧揖江山拄杖前獨鳥倦歸翻落日誰家晨爨起疎煙
根塵應接無留礙笑殺西來面壁禪

龍華大像蓋冀國夫人所作因成兩絕

慧性元從戒定熏百花潭水浣僧裾箇中力量真超絕

故老猶傳娘子軍

生男箇箇欲如狼
婦女軍中氣不揚
試問爭功嗔目士
幾人能敵浣花娘



宋元詩會卷十七